



Los ntawm Thawj Tswj Hwm Thomas S. Monson

Ua Ib tug Yam Ntxwv thiab Ib Qho Kaj

Thaum peb ua raws li tus Cawm Seej tus yam ntxwv, peb yuav muaj cib fim ua ib qho kaj rau hauv lwm tus lub neej.

Cov kwv tij thiab cov muam, kuv zoo siab los nrog nej nyob dua. Xws li nej paub, txij li peb nyob ua ke thaum lub Plaub Hlis Ntuj los, peb tu siab kawg vim peb xiam peb tug Thwj Tim uas peb hlub: Thawj Tswj Hwm Boyd K. Packer, Txwj Laug L. Tom Perry, thiab Txwj Laug Richard G. Scott. Lawv tau rov mus rau lawv lub tsev saum ntuj ceeb tsheej. Peb nco lawv. Peb muaj kev ris txiaj rau lawv tus yam ntxwv txog Yexus txoj kev hlub thiab rau tej kev qhia uas lawv tau muab rau peb sawv daws.

Peb zoo siab tos txais peb cov Thwj Tim tshiab, Txwj Laug Ronald A. Rasband, Txwj Laug Gary E. Stevenson, thiab Txwj Laug Dale G. Renlund. Cov txiv neej no yeej rau siab ntso ua tus Tswv txoj hauj lwm. Lawv yeej tsim nyog ua tej hauj lwm tseem ceeb uas lawv raug hu los ua no.

Tsis ntev tas los no, thaum kuv nyeem thiab xav txog cov vaj lug kub, muaj ob nqe uas kuv pheej xav txog. Peb yeej paub ob nqes no. Thawj

nqe yog los ntawm Zaj Lus Qhia Nyob Pem Roob: “Ib yam li ntawd, nej yuav tsum ci rau sawv daws pom tej hauj lwm zoo uas nej ua, lawv thiaj yuav qhuas nej Leej Txiv tus uas nyob saum ntuj ceeb tsheej.”¹ Nqe thib ob los rau hauv kuv lub paj hlwb thaum kuv tseem xav txog lub ntsiab rau nqe thib ib. Nws yog hauv tus Thwj Tim Pov Lauj tsab Ntawv rau Timautes: “Yuav tsum ua lub neej rau cov ntseeg xyau, tsis hais tej lus uas hais, tej hauj lwm uas ua, hlub lwm tus, muab siab rau ntseeg thiab ua neeg zoo.”²

Kuv xav tias nqe thib ob no piav seb, peb yuav ua li cas thiaj ua tau raws li nqe thib ib. Peb ua yam ntxwv rau cov neeg ntseeg xyau thaum peb ua raws li Yexus Khetos txoj moo zoo hais txog tej lus uas peb hais, tej hauj lwm uas peb ua, hlub lwm tus, muab siab rau ntseeg thiab ua neeg zoo. Thaum peb ua li no, peb qhov kev kaj yuav ci rau lwm tus neeg pom.

Peb txhua tus uas los nyob hauv ntiaj teb yeej muaj Khetos txoj Kev Kaj. Thaum peb ua raws li tus Cawm

Seej tus yam ntxwv thiab ua neej ib yam li Nws tau ua thiab Nws tau qhia, qhov kaj ntawd yuav ci tuaj hauv peb nruab siab thiab yuav taw teeb rau lwm tus neeg pom kev.

Tus Thwj Tim Pov Lauj qhia txog rau yam uas ib tug ntseeg muaj, tej yam uas yuav cia peb qhov kaj ci ntsa iab. Cia peb xav txog txhua yam no.

Cia kuv hais txog thawj ob qho ua ke—ua ib tug yam ntxwv txog tej lus uas peb hais thiab tej hauj lwm uas peb ua. Tej lus uas peb hais yuav txhawb nqa thiab pab, los yog tej ntawd ua tau rau neeg raug mob thiab

tsim txom luag. Niaj hnub nim no hauv ntiaj teb no muaj neeg coob uas hais lus dev nyob ib puag peb ncig. Nyuaj heev kom tsis txhob hnov luag hais lus dog lus dig thiab tsis zoo hais txog Vajtswv. Yeej hnov tej lus tsis zoo hauv TV, cov yeeb yaj kiab, hauv cov ntawv thiab cov nkauj. Tib neeg pheej hais lus dag thiab chim siab taug xaiv li ub li no. Cia peb muaj kev hlub thiab saib tau lwm tus neeg rau nqi thaum peb hais lus, hais tej lus zoo thiab tsis txhob hais tej lus uas yuav ua rau neeg mob los sis tu siab. Thov kom peb yuav ua raws li tus Cawm Seej tus yam ntxwv, vim nws ua siab ntev thiab siab zoo hauv tag nrho Nws txoj kev qhuab qhia tib neeg.

Lwm yam uas Pov Lauj hais txog yog kev siab hlub, uas txhais tau hais tias “txoj kev hlub dawb paug ntawm Khetos.”³ Kuv paub hais tias muaj cov neeg uas nyob ntawm peb ib ncig uas yeej kho siab, cov uas muaj mob, thiab cov uas tau poob siab. Peb los muaj cib fim pab lawv thiab nplij lawv siab. Tus Cawm Seej tau coj kev cia siab los rau cov uas poob siab

thiab ntxiv zog rau cov uas qaug zog. Nws tau kho cov neeg mob; Nws pab cov neeg ceg tawv mus tau kev, cov dig muag kom pom kev, cov neeg lag ntseg kom hnov tau lus. Nws twb tsa cov neeg tuag sawv rov qab los. Hauv nws txoj kev qhuab qhia Nws tau muaj kev siab hlub rau txhua tus uas xav tau. Thaum peb ua raws li Nws tus yam ntxwv, peb yuav foom koob hmoov rau tib neeg, kuj foom koob hmoov rau peb tus kheej thiab.

Qhov tom ntej, peb yuav tsum ua yam ntxwv ntawm sab ntsuj plig. Rau kuv mas qhov no txhais tau hais tias peb yuav tsum ua siab zoo, muaj kev ris txiaj, zam txim, thiab ua zoo rau lwm tus. Tej cwj pwm no yuav ua rau peb tus ntsuj plig muaj hwj chim pab tau cov neeg uas nyob ntawm peb ib ncig. Kuv muaj hmoov vim ntau xyoo no kuv tau nrog neeg coob uas muaj tus ntsuj plig li no sib raug zoo. Peb hnov tau ib txoj kev xav tshwj xeeb thaum peb nrog lawv nyob ua ke, ib txoj kev xav kom peb yuav nrog lawv sib raug zoo thiab xav ua raws li lawv tus yam ntxwv. Lawv muaj Khetos txoj Kev Kaj thiab pab peb hnov tau Nws txoj kev hlub rau peb.

Vim xav qhia tias lwm tus neeg yeej pom tau qhov kaj uas los ntawm ib tug ntsuj plig uas muaj kev hlub, kuv xav qhia nej txog ib zaj uas kawj los ntau xyoo tas los lawm.

Lub sij hawm ntawd, cov thawj coj hauv lub Koom Txoos tau mus ntsib cov nom tswv hauv Yeluxalees kom sib yeem lus hais txog kev xaub ib thaj av rau lub Koom Txoos ua ib qho chaw kawm ntawv hauv Yeluxalees. Kom thiaj tau daim ntawv tso cai, lub Koom Txoos tau yeem lus hais tias peb cov mej zeej uas nyob hauv qhov chaw ntawd yuav tsum tsis txhob sim tshaj tawm txoj moo zoo. Tom qab sib yeem lus li no lawm, haiv neeg Ixayees ib tug nom tswv, uas paub lub Koom Txoos thiab ib co mej zeej zoo, hais tias nws yeej paub tias lub Koom Txoos yuav ua raws li txoj kev sib yeem lus kom txhob tshaj tawm txoj moo zoo. “Tiam sis,” nws hais txog cov tub kawm ntawv uas yuav

los nyob ntawd hais tias, “peb yuav ua li cas rau qhov uas ci ci ntawm lawv lub qhov muag li?”⁴ Thov kom qhov kaj ntawd yuav ci ntsa iab ntawm peb tsis tu tsis tseg, xws kom lwm tus neeg yuav pom tau.

Ua ib tug yam ntxwv txog kev ntseeg txhais tau tias peb tso siab rau tus Tswv thiab Nws txoj lus. Nws txhais tau tias peb yeej muaj thiab ua tib zoo tu tej kev ntseeg uas coj peb tej kev xav thiab tej yam uas peb ua. Peb txoj kev ntseeg tus Tswv Yexus Khetos thiab peb Leej Txiv Saum Ntuj Ceeb Tsheej yuav coj kav txhua yam uas peb ua. Nyob ntawm tej kev kub ntxhov hauv peb lub caij nyoo, tej kev tsis sib haum xeeb hauv peb lub paj hlwb, thiab tej kev ntxhov siab hauv peb lub neej, txoj kev ntseeg yog qhov uas ua rau peb nyob ruaj nrees. Nco qab hais tias kev ntseeg thiab kev ua xyem xyav nyob tsis tau tib txhij hauv ib lub paj hlwb, rau qhov ib yam yeej yuav ua rau lwm yam ntawd ploj mus. Kuv rov qab qhia qhov uas peb twb hnov ntau zaus lawm hais tias—yog peb yuav tau thiab ceev txoj kev ntseeg uas peb xav tau, ces peb yuav tsum nyeem thiab kawm thiab xav txog cov vaj lug kub. Txoj kev nrog peb Leej Txiv Saum Ntuj Ceeb Tsheej sib txuas lus thaum thov Vajtswv yeej tseem ceeb heev. Peb muab tej ntawd xyeej pov tseg tsis tau, vim tus yeeb ncuab thiab nws cov dab pheej ntaus peb tej ris tsho ua rog tsis tu tsis tseg, lawv nrhiav kom tau peb txoj tsis ntseeg. Tus Tswv hais kom peb mob siab nrhiav, thov Vajtswv tas mus li, thiab cia li ntseeg, ces txhua yam yuav ua hauj lwm ua ke kom zoo rau peb.⁵

Qhov kawg, peb yuav tsum ua neeg zoo, uas txhais tau hais tias peb lub cev, sab paj hlwb, thiab tus ntsuj plig yuav tsum huv huv. Peb los paub hais tias peb lub cev yog ib lub tuam tsev, yuav tsum ua tib zoo hwm thiab saib nws rau nqi. Yuav tsum muab tej kev xav zoo thiab cov tswv yim zoo tso rau hauv peb lub paj hlwb tsis txhob xav txog tej yam kev phem kev qias. Xwv kom tus Vaj Ntsuj Plig Dawb Huv yuav pheej ua

peb tus khub ces, peb yuav tsum ua neeg txim txiaj. Cov kwv tij thiab cov muam, kev huv huv yuav coj kev kaj siab lug los thiab yuav ua rau peb tsim nyog tau tej yam uas tus Cawm Seej tau cog lus tseg. Nws hais tias, “Cov uas muaj lub siab ncaj ncees, cov ntawd tau koob hmoov; lawv yuav pom Vajtswv.”⁶

Thaum peb qhia tias peb yog cov yam ntxwv hais txog tej lus uas peb hais, tej hauj lwm uas peb ua, hlub lwm tus, muab siab rau ntseeg thiab ua neeg zoo, peb thiaj yuav tsim nyog ua qhov kaj rau lub ntiaj teb tau pom kev.

Kuv xav hais rau nej sawv daws, qhov tseem ceeb yog rau nej cov neeg hluas tias, thaum lub ntiaj teb haj yam khiav deb ntawm tej ntsiab cai thiab kev coj qhia uas peb Leej Txiv Saum Ntuj Ceeb Tsheej muab rau peb lawm, lwm tus neeg yuav pom tau peb hauv ib pab neeg coob coob vim peb yeej ua txawv. Peb yuav txawv vim hais tias peb hnav tej khaub ncaws uas npog lub cev. Peb yuav txawv vim peb tsis hais lus dev thiab peb tsis noj tsis haus tej yam uas phem rau peb lub cev. Peb yuav txawv vim peb tsis hais tej lus qias thiab cov lus uas thuam lwm tus neeg. Peb yuav txawv thaum peb txiav txim kom txhob saib tej yam phem thiab qias hauv TV thiab cov duab uas yuav tshem tus ntsuj plig tawm ntawm peb lub tsev thiab peb lub neej. Peb yeej yuav txawv txav thaum peb xaiv los ua tej yam tsim txiaj—xaiv los ua raws li txoj moo zoo tej ntsiab cai thiab kev cai. Tej yam uas ua rau peb txawv txav ntawm lub ntiaj teb kuj muab qhov kaj rau peb thiab tus ntsuj plig ntawd yuav ci ntsa iab rau ib lub ntiaj teb uas tsuas haj yam tsaus ntuj tuaj xwb.

Feem ntau mas nyuaj nyuaj kom ua neeg txawv txav thiab ua rau lwm tus pom tau yus hauv ib pab neeg coob coob. Peb ib txwm ntshai tsam luag tej xav tsis zoo txog peb. Kuv nyiam cov lus hauv Phau Ntawv Nkauj hais tias: “Tus Tswv yog lub teeb rau kuv pom kev thiab yog

kuv tus cawm seej; yog li ntawd kuv yuav ntshai leej twg? tus Tswv tsum kwm kuv, kuv thiaj tsis raug kev puas tsuaj kuv yuav tsis ntshai dab tsi li?"⁷ Thaum peb tso Yexus nruab plawv peb lub neej, txoj kev ua siab loj ua raws li peb txoj kev ntseeg yuav los pauv txoj kev ntshai chaw.

Lub neej no tsis zoo tag nrho rau leej twg li, thiab tej thaum tej kev cov nyom thiab tej teeb meem uas peb muaj yuav kov yeej peb, es ua rau peb qhov kaj tsaus me ntsis. Tiam sis, yog tias tau kev pab los ntawm peb Leej Txiv Saum Ntuj Ceeb Tsheej, nrog rau lwm tus neeg txoj kev pab, peb yuav rov qab muaj qhov kaj uas yuav pab peb pom kev dua thiab yuav ci ntsa iab rau lwm tus neeg pom kev thiab.

Kom qhia tau ntiv txog qhov no kuv xav nyeem ib co lus uas kuv nyiam hauv ib zaj paj huam uas kuv tau nyeem ntau xyoo tas los lawm hais tias:

*Kuw ntsib ib tug neeg qhuas thaum yav tsaus ntuj
Uas lub teeb tub tuag tas.
Kuw nres thiab cia nws taw
Nws lub teeb los ntawm kuv li.*

Txawm muaj cua dab cua dub

*Uas ua rau lub ntiaj teb tshee hnyo,
Ces thaum cua tu lawm
Kuw lub teeb tuag lawm!*

*Tiam sis tus neeg qhuas txawm rov qab los—
Nws lub teeb ci ntsa iab!
Nws tuav rawv lub teeb uas ci lawm lug
Thiab cev los taw kuv lub teeb thiab!*⁸

Kuv cov kwv tij thiab cov muam, txhua txhia hnuv peb muaj cib fim ci ntsa iab, tab txawm peb nyob qhov twg los xij. Thaum peb ua raws li tus Cawm Seej tus yam ntawv, peb yuav muaj cib fim ua ib lub teeb rau cov neeg nyob ze peb, txawm yog lawv nyob hauv peb tsev neeg thiab cov phooj ywg, cov neeg ua hauj lwm nrog peb, cov neeg uas peb tsis paub zoo, los sis cov neeg qhuas los xij.

Rau nej sawv daws kuv qhia nej tias nej yog peb Leej Txiv Saum Ntuj Ceeb Tsheej ib tug tub los sis ntxhais. Nej tawm ntawm Nws xub ntiag los nyob hauv lub ntiaj teb no rau ib lub caij, kom los koj yam ntawv txog tus Cawm Seej txoj kev hlub thiab tej lus qhia thiab kom nej yuav ua siab loj ci ntsa iab rau txhua tus neeg tau pom kev.

Thaum lub caij hauv ntiaj teb no tiav tas, yog tias nej tau ua nej txoj hauj lwm, nej yuav muaj hmoov rov qab mus nrog Nws nyob tas mus ib txhis.

Tus Cawm Seej nplij peb siab hais tias: "Kuv yog qhov kaj rau neeg ntiaj teb. Tus uas raws kuv qab yuav tsis taug txoj kev uas tsaus ntuj nti, tiam sis nws yuav tau lub neej tshav ntuj nrig."⁹ Kuv hais lus tim khawv txog Nws. Nws yog peb tus Cawm Seej thiab tus Txhiv Dim, tus uas Sawv Cev nrog Leej Txiv rau peb. Nws yog peb tus yam ntawv thiab peb lub zog. Nws yog "qhov kaj uas ci hauv kev tsaus ntuj."¹⁰ Thov kom txhua tus uas hnouv tau kuv lub suab yuav cog lus tseg hais tias yuav raws Nws qab, es thiaj rais los mus ua ib qho kaj rau lub ntiaj teb, kuv thov kom muaj li no hauv Nws lub npe dawb hav, tus uas yog tus Tswv Yexus Khetos, amees.


LUS CIM

1. Mathais 5:16.
2. 1 Timautes 4:12.
3. Maulaunais 7:47.
4. Saib James E. Faust, "The Light in Their Eyes," *Liahona*, Kaum Ib Hlis Ntuj 2005, 20.
5. Lus Qhuab Qhia thiab Kev Khi Lus 90:24.
6. Mathais 5:8.
7. Phau Ntawv Nkauj 27:1.
8. Lon Woodrum, "Lamps," *The Lighted Pathway*, Kaum Hli Ntuj 1940, 17.
9. Yauhas 8:12.
10. Lus Qhuab Qhia thiab Kev Khi Lus 6:21.

Kev Qhia rau Peb lub Caij Nyoog

Txij thaum lub Kaum Ib Hlis Ntuj xyoo 2015 mus txog lub Plaub Hlis Ntuj xyoo 2016, yuav tsum npaj ib zaj los yog ob peb zaj lus hais los ntawm lub Kaum Hli Ntuj xyoo 2015 lub tuam rooj sab laj kom qhia hauv pawg Pov Thawj Hwj Mekixedes thiab Koom Haum Niam Tsev tej kev sib ntsib thaum hnuv Sunday. Thaum Plaub Hlis Ntuj xyoo 2016, xaiv tau tej zaj los ntawm lub Plaub Hlis Ntuj xyoo 2016 los sis Kaum Hli Ntuj xyoo 2015 lub tuam rooj sab laj. Ceg txheem ntseeg thiab koog chaw cov thawj tswj hwm xaiv tej zaj lus hais uas yuav siv nyob hauv lawv tej cheeb tsam, los yog lawv muab lub luag hauj lwm no so rau cov npisov los yog ceg ntseeg cov thawj tswj hwm xaiv los tau thiab.

Cov lus hais no muaj txawm peem ua ntau yam lus nyob rau ntawm conference.lds.org.



Los ntawm Thawj Tswj Hwm Henry B. Eyring

Tus Pab Cuam thib Ib hauv Thawj Pawg Thawj Tswj Hwm

Tus Vaj Ntsuj Plig Dawb Huv Ua Koj tus Khub

Yog tias peb ua neej tsim nyog txais, peb yuav muaj cuab kav, tau txoj koob hmoov muaj tus Ntsuj Plig nrog peb nyob, tsis yog tas sim no xwb tiam sis txhua lub sij hawm.

Kuv cov kwv tij thiab cov muam, kuv muaj kev ris txiaj vim kuv tuaj nrog nej sib koom ua ke Hnub Caiv no hauv tus Tswv lub Koom Txoos lub tuam rooj sab laj no. Kuv tau hnov tus Ntsuj Plig, tus Vaj Ntsuj Plig Dawb Huv, ib yam li nej tau hnov, los ua tim khawv txog qhov tseeb rau tej lus thiab tej nkauj uas peb tau hnov lawm.

Hnub no kuv lub hom phiaj yog pab kom nej haj yam muaj lub siab xav thiab kom nej txais tau qhov khoom plig uas cog lus tseg rau peb txhua tus tom qab peb ua kev cai raus dej. Hauv txoj kev pom zoo peb tau hnov cov lus no dua: “Txais yuav tus Vaj Ntsuj Plig Dawb Huv.”¹ Txij lub sij hawm ntawd los, peb lub neej raug hloov hlo tas mus ib txhis.

Yog tias peb ua neej tsim nyog txais, peb yuav muaj cuab kav, tau txoj koob hmoov muaj tus Ntsuj Plig nrog peb nyob, tsis yog tas sim thiab tom ntej xwb, ib yam li hauv tej yam tshwj xeeb li peb muaj hnub no, tiam sis txhua lub sij hawm. Nej paub cov

lus ntawm zaj lus thov Vajtswv rau lub cim nco txog yuav ua li cas thiaj ua tau raws li lo lus cog tseg no: “Au Vajtswv, Leej Txiv tus uas Nyob Mus Ib Txhis, peb thov koj ntawm koj Leej Tub, Yexus Khetos lub npe, kom koj foom koob hmoov thiab tshwj cov mov mog no tseg cia kom dawb huv rau lawv sawv daws cov tau noj; kom lawv cov uas tau noj kom nco txog koj Leej Tub lub cev, thiab ua tim khawv rau koj, Au Vajtswv, Leej Txiv tus uas Nyob Mus Ib Txhis, kom lawv txaus siab txais koj Leej Tub lub npe, thiab nco ntsoov txog nws, thiab koj raws li nws tej lus txib uas nws tau muab rau lawv.”

Ces tau lo lus cog tseg zoo kawg no: “Kom lawv thiaj li yuav muaj nws Leej Ntsuj Plig *nij hnub* nrog lawv nyob” (Q&K 20:77; tau ntxiv cov ntawv qaij).

Qhov uas nij hnub muaj tus Ntsuj Plig nrog lawv nyob txhais tau hais tias tau tus Ntsuj Plig txoj kev coj qhia hauv peb lub neej. Piv xam hais tias, tej zaum tus Ntsuj Plig yuav ceeb

toom peb kom tiv tau kev haub ntxias los ua tej yam phem.

Vim yog lub ntsiab ntawd xwb, peb thiaj to taub yog vim li cas tus Tswv cov tub qhe tau xav pab peb haj yam muaj siab xav pe hawm Vajtswv hauv peb tej kev sib ntsib noj lub cim nco txog. Yog tias peb muaj kev ntseeg thaum peb noj lub cim nco txog, ces tus Vaj Ntsuj Plig Dawb Huv yuav muaj cuab kav pov hwm peb thiab cov uas peb hlub kom txhob raug tej kev haub ntxias uas haj yam muaj zog tawm tsam peb.

Thaum muaj tus Vaj Ntsuj Plig Dawb Huv ua peb tus khub ces peb haj yam nyiam qhov zoo thiab tsis xav ua raws li tej kev ntxias. Qhov ntawd nkaus xwb yuav tsum txaus los pab peb muaj lub siab xav ua neeg tsim nyog tau tus Ntsuj Plig nij hnub nrog peb nyob.

Ib yam li tus Vaj Ntsuj Plig Dawb Huv ntxiv zog rau peb txoj kev tiv taus kev phem, Nws kuj pab peb muaj hwj chim saib pom qhov tseeb thiab qhov cuav sib txawv li cas. Peb tsuas paub qhov tseeb uas tseem ceeb tshaj plaws thaum peb tau kev tshwm sim los ntawm Vajtswv. Tib neeg lub tswv yim thiab tej yam uas peb to taub yuav tsis txaus. Peb nyob hauv ib lub caij nyooog uas ua rau cov neeg txawj ntse tshaj plaws yuav tsis tshua pom tau qhov tseeb vim muaj kev dag ntau kawg nkaus li.

Tus Tswv tau qhia Nws tus Thwv Tim Thaumias, uas xav tau puav pheej txog tus Cawm Seej txoj Kev Sawv Rov Los thaum nws kov tau Nws tej qhov caws pliaiv, hais tias kev tshwm sim yeej tseem ceeb dua: “Yexus hais rau Thaumias hais tias, “Koj pom kuv, koj thiaj ntseeg xwb

los? Tus uas tsis tau pom kuv tiam sis nws ntseeg, tus ntawd tau koob hmoov” (Yauhas 20:29).

Tus Vaj Ntsuj Plig Dawb Huv pom zoo rau tej kev tseeb uas ua cim rau txoj kev uas coj peb rov mus rau Vajtswv lub tsev. Peb tsis muaj cuab kav mus hauv koog ntoo thiab pom Leej Txiv thiab Leej Tub hais lus rau tus tub hluas Yauxej Xamiv. Tsis muaj ib yam puav pheej los sis lub tswv yim uas qhia tau tseeb tias Eliyas tau los ib yam li tau cog tseg lawm los muab cov yuam sij rau lub pov thawj hwj uas yog cov uas tus yaj saub uas tseem muaj sia nyob, Thawj Tswj Hwm Thomas S. Monson, tseem tuav thiab siv.

Vajtswv ib tug tub los sis ntxhais yuav paub qhov tseeb thaum nws muaj cai txais yuav tus Vaj Ntsuj Plig Dawb Huv. Vim peb hnov tau tej yam cuav thiab kev dag thaum twg los tau, peb yuav tsum muaj tus Ntsuj Plig ntawm Kev Tseeb txhua lub caij kom peb thiaj tsis txhob poob siab.

Thaum tseem ua ib tug mej zeej hauv Pawg Kaum Ob tug Thwj Tim, George Q. Cannon yaum kom peb yuav tsum nrhiav kom tau tus Ntsuj Plig uas peb tus khub tsis tu tsis tseg. Nws cog lus, thiab kuv kuj cog lus tib yam hais tias, yog peb yuav ua li ntawd, peb “yeej yuav paub” qhov tseeb, “yuav tsis poob siab los sis nyob hauv kev tsaus ntuj ib zaug,” thiab peb “txoj kev ntseeg yuav muaj zog, [peb] yuav muaj kev zoo siab . . . puv npo.”²

Peb xav tau kev pab tsis tu tsis tseg uas yog tus Vaj Ntsuj Plig Dawb Huv txoj kev ua khub rau lwm lub ntsiab. Tej zaum ib tug neeg uas peb hlub yuav tso lub neej no tseg. Twb yog tus Vaj Ntsuj Plig Dawb Huv txoj kev ua tim khawv txog ib Leej Txiv Saum Ntuj Ceeb Tsheej uas hlub peb thiab tus Cawm Seej uas sawv rov qab los uas ua rau peb muaj chaw cia siab thiab kev nplij siab thaum peb xiam ib tug uas peb hlub. Yuav tsum muaj zaj lus tim khawv ntawd thaum muaj kev ploj kev tuag.

Yeej muaj ntau lub ntsiab, uas qhia seb yog vim li cas peb pheej

xav tau tus Vaj Ntsuj Plig Dawb Huv txoj kev ua peb tus khub. Peb xav tau, tab sis mas peb yeej paub tias nws tsis yooj yim ua neej tas mus li kom muaj li no. Peb txhua tus niaj hnuv xav, hais, thiab ua tej yam uas ua rau tus Ntsuj plig tu siab. Tus Tswv qhia peb tias tus Vaj Ntsuj Plig Dawb Huv yuav pheej ua peb tus khub thaum peb lub siab muaj kev siab hlub puv npo thiab thaum kev tsim txiaj coj kav peb tej kev xav tsis tu tsis tseg (saib Q&K 121:45).

Rau nej cov uas muaj teeb meem ua raws li tej kev cai uas teem tseg kom yus thiaj tsim nyog tau qhov khoom plig uas yog tus Ntsuj Plig txoj kev ua yus tus khub, kuv xav muab cov lus no los txhawb nqa nej. Nej twb muaj tej lub sij hawm thaum nej tau hnov tus Vaj Ntsuj Plig Dawb Huv txoj kev tshoov siab. Tej zaum hnuv no nej twb hnov li ntawd.

Nej saib tau tej lub sij hawm uas nej tau kev tshoov siab ntawd ib yam li lub noob txog kev ntseeg uas Amas piav txog (saib Amas 32:28). Muab txhua lub cog cia. Nej ua tau li ntawd thaum nej ua raws li txoj kev tshoov siab uas nej tau hnov. Txoj kev tshwm sim tseem ceeb tshaj plaws yuav yog kom koj paub seb Vajtswv xav kom koj ua dab tsi. Yog hais tias yog kom them ib feem kaum los sis mus xyuas ib tug phooj ywg uas nyuaj siab, ces koj yuav tsum ua li ntawd. Txawm yog yam dab tsi los, cia li ua kiag. Thaum nej qhia tias nej kam mloog lus, tus Ntsuj Plig yuav tshoov nej siab ntxiv seb Vajtswv xav kom nej ua dab tsi pab Nws.

Thaum nej mloog lus, tus Ntsuj Plig tej kev tshoov siab yuav ib sij los, yuav haj yam muaj nws ua yus tus khub. Nej haj yam yuav muaj hwj chim xaiv ua qhov yog.

Nej yuav muaj cuab kav paub thaum twg tej kev tshoov siab no los ntawm tus Ntsuj Plig los es tsis yog li nej lub siab xav xwb. Thaum tej kev tshoov siab haum nrog tus Cawm Seej thiab Nws cov yaj saub thiab cov thwj tim uas muaj sia nyob cov lus qhia ces, nej yuav ua siab loj xaiv los

mloog lus. Ces tus Tswv yuav xa Nws tus Ntsuj Plig los nrog nej nyob.

Piv xam hais tias, yog tias nej tau ib txoj kev tshoov siab kom hawm Hnuv Caiv, tab txawm ua li ntawd nyuaj los, Vajtswv yeej yuav xa Nws tus Ntsuj Plig los pab nej.

Kuv txiv tau txoj kev pab ntawd ntau xyoo tas los lawm thaum nws mus ua hauv lwm tim Australia teb. Nws nyob nws ib leeg xwb thaum Hnuv Caiv, thiab nws xav noj lub cim nco txog. Nws nrhiav tsis tau tej xov xwm txog ib Tsoom Haiv Neeg Ntseeg hauv Hnuv Nyooq Kawg tej kev sib ntsib. Ces nws tau pib taug kev. Nws thov Vajtswv pab nws paub seb yuav lem es taug txoj kev twg. Tom qab taug kev thiab lem li ub li no tau ib xuab moos lawm, nws tau nres thiab thov Vajtswv dua. Nws tau kev tshoov siab kom lem es taug ib txoj kev ntawd. Tsis ntev ces nws hnov leej twg hu nkauj hauv ib lub tsev kem ua nyob ze ze ntawd. Nws ntsia hauv qhov rais thiab pom ob peb tug neeg zaum ze ib lub rooj uas muaj ib daim ntaub dawb uas npog cov tais yais lub cim nco txog.

Nim no, tej zaum nej yuav xav tias qhov ntawd yog ib yam me me xwb, tiam sis yog ib yam tseem ceeb rau nws. Nws paub tias txoj kev cog lus ntawm zaj thov Vajtswv rau lub cim nco txog muaj tiav los: “Nco ntsoov txog nws, thiab coj raws li nws tej lus txib uas nws tau muab rau lawv; kom lawv thiaj li yuav muaj nws Leej Ntsuj Plig niaj hnuv nrog lawv nyob” (Q&K 20:77).

Qhov ntawd tsuas yog ib qho piv txwv txog lub sij hawm thaum nws thov Vajtswv thiab ua raws li tus Ntsuj Plig qhia tias Vajtswv xav kom nws ua dab tsi. Nws twb ua li no ntau ntau xyoo, ib yam li kuv thiab nej yuav ua. Nws ib txwm tsis tshua tham txog nws sab ntsuj plig. Nws tsuas pheej ua tej yam me me pab tus Tswv uas nws raug txhib kom ua xwb.

Thaum twg ib pawg neeg hauv Ib Tsoom Haiv Neeg Ntseeg hauv Hnuv Nyooq Kawg thov nws los hais lus, nws tau ua li ntawd. Nws tsis khe

puas yog 10 leej los sis 50 leej los sis nws nkees npaum li cas. Nws tau ua tim khawv txog Leej Txiv, Leej Tub, thiab tus Vaj Ntsuj Plig Dawb Huv, thiab cov yaj saub thaum twg tus Ntsuj Plig tshoov nws siab kom ua li ntawd.

Nws txoj hauj lwm siab tshaj plaws hauv lub Koom Tsoos yog rau Bonneville Ceg Txheem Ntseeg pawg sab laj hlob, es nyob ntawd nws tau mus dob nroj hauv ceg txheem ntseeg thaj teb, thiab nws qhia Hnub Caiv Kev Kawm Vaj Lug Kub ib chav kawm. Tau ntau xyoos, thaum twg nws xav tau ces, tus Vaj Ntsuj Plig Dawb Huv yeej nyob ntawd ua nws tus khub.

Kuv tau sawv ntawm kuv txiv ib sab hauv ib chav tsev hauv lub tsev kho mob. Kuv niam, nws tus poj niam rau 41 xyoos, tau pw hauv lub txaj. Wb twb saib xyuas nws tau ntau teev lawm. Wb pib pom qhov kev hnov mob ntawm nws ntsej muag ploj mus. Nws ob txhais tes uas nws muab ua nrig khov kho txawm xooob lawm. Nws ob txhais caj npab txawm nyob twj ywm ntawm nws ob sab tav.

Tej kev mob vim nws mob khaxawj tau ntau ntau xyoo lawm pib ploj mus. Kuv tau pom kev kaj siab lug ntawm nws lub ntsej muag. Nws tau ua ob peb pa hlob hlob, ces tau huas pa, ces tau pw ntsiag tos. Wb sawv ntawd sim saib seb nws puas yuav ua pa ntxiv li.

Thaum kawg, kuv Txiv hais twj ywm hais tias, “Ib tug ntxhais hluas twb mus tsev lawm.”

Nws tsis poob kua muag li. Yog vim hais tias tus Vaj Ntsuj Plig Dawb Huv twb qhia nws meej meej hais tias nws yog leej twg, nws tuaj qhov twg tuaj, nws tau rais los mus ua tus neeg zoo li cas, thiab nws tab tom mus qhov twg. Tus Ntsuj Plig twb ua tim khawv ntau zaus rau nws txog Leej Txiv Saum Ntuj Ceeb Tsheej uas hlub nws, txog ib tug Cawm Seej uas tau kov yeej txoj kev tuag, thiab qhia tseeb hais tias txoj kev muab nws tus poj niam thiab tsev neeg khi ua ke yeej muaj tseeb.

Tus Ntsuj Plig twb qhia rau nws tias nws tus poj niam muaj lub siab zoo thiab kev ntseeg txaus nws thiaj yuav tsim nyog rov qab mus saum ntuj ceeb tsheej vim nws yog ib tug me nyuam ntawm txoj kev cog lus thiab yuav tau koob meej thaum nws los tsev.

Rau kuv txiv mas, qhov ntawd yeej ntau tshaj txoj kev cia siab. Tus Vaj Ntsuj Plig Dawb Huv tau qhia nws tias qhov no muaj tseeb tiag.

Nim no, ib txhia yuav xav tias nws cov lus los sis tej kev xav hauv nws paj hlwb txog lub tsev saum ntuj ceeb tsheej yog ib qho tswv yim zoo, ib yam uas lam txhawb nqa ib tug txiv vim nws xiam tus uas nws hlub xwb. Tiam sis nws twb paub qhov tseeb uas kav mus ib txhis vim yog tib yam uas yus thiaj paub tau li ntawd.

Nws yog ib tug kws ua txuj ci uas tau nrhiav tej qhov tseeb hauv lub ntiaj teb hauv tag nrho nws lub neej. Nws tau siv cov cuab yeej ua txuj ci tom hauj lwm ua li cov neeg thoob plaws ntiaj teb no qhuas nws tej hauj lwm. Ntau yam ntawm txoj kev ua txuj ci yog qhov uas nws pom tej yam me me hauv ntiaj teb no ces nws xyaum ua tej ntawd tom tsev hauj lwm seb tej yam khoom puas khiav li nws xav.

Tiam sis nws ua lwm yam thaum nws xav nrhiav qhov tseeb uas tseem ceeb tshaj plaws rau nws thiab peb txhua tus. Tsuas yog dhau ntawm tus Vaj Ntsuj Plig Dawb Huv xwb peb thiaj pom tau tib neeg thiab tej yam xwm ib yam nkaus li Vajtswv pom.

Tseem muaj tib qho khoom plig ntawd hauv lub tsev kho mob tom qab nws tus poj niam tuag. Peb tau khaws kuv niam tej khoom yuav nqa mus tsev. Txiv tau nres hais ua tsaug rau txhua tus nais maum thiab kws kho mob uas wb ntsib thaum mus rau lub tsheb. Kuv nco qab tias kuv, ib nyuag chim, vim xav tias wb yuav tsum mus nyob wb ob leeg muaj kev tu siab xwb.

Tsam no kuv thiaj paub tias nws pom tau tej uas tus Vaj Ntsuj Plig Dawb Huv tau muab rau nws saib

lawm. Nws pom hais tias cov neeg ntawd yog cov tim tswv uas Vajtswv tau txib los saib xyuas nws tus me poj niam. Tej zaum lawv tsuas xav hais tias lawv yog cov neeg kho mob xwb, tiam sis Txiv tab tom ua lawv tsaug rau lawv tej hauj lwm sawv tus Cawm Seej cev.

Tus Vaj Ntsuj Plig Dawb Huv txoj kev tshoov siab nrog wb nyob thaum wb txog tom kuv niam txiv lub tsev. Wb tau tham ob peb feeb hauv hoob nyob. Txiv khiav mus tom nws txaj pw.

Tom qab ob peb feeb, nws rov qab los rau hauv hoob nyob. Nws luag nyav. Nws los ntsib peb thiab hais tias, “Kuv txhawj tsaum Mildred yuav los txog lub ntuj ntsuj plig nyob nws ib leeg xwb. Kuv xav tias nws yuav kho siab hauv pab neeg coob coob.”

Ces nws zoo siab hais tias, “Kuv nyuam qhuav thov Vajtswv. Kuv paub hais tias Mildred nyob zoo. Kuv niam twb nyob ntawd tos txais nws.”

Kuv nco qab tias kuv tau luag nyav thaum nws hais li ntawd, kuv tau xav txog kuv pog, nws yog neeg qis taub, kuv xam pom nws khiav mus phoom cov neeg coob coob mus ntsib thiab puag nws tus nyab thaum nws txog ntawd.

Nim no, ib lub ntsiab ntawm qhov uas kuv txiv thov kom tau thiab yeej txais tau kev nplij siab yog txij li nws ua me nyuam yaus nws tau muaj kev ntseeg thov Vajtswv. Nws ib txwm tau lus teb los rau hauv nws lub siab kom nws tau kev nplij siab thiab kev coj qhia. Tsis yog nws ib txwm thov Vajtswv xwb, tab sis mas nws paub cov vaj lug kub thiab cov yaj saub uas muaj sia nyob cov lus thiab. Ces nws thiaj paub tus Ntsuj Plig tej kev ntxhi lus, uas tej zaum nej tau hnov hnub no thiab.

Tus Ntsuj Plig txoj kev ua khub yeej ntau tshaj txoj kev nplij siab thiab kev coj nws kev. Twb tau hloov nws lub siab dhau ntawm Yexus Khetos txoj Kev Theej Txhoj. Thaum peb txais kev cog lug kom muaj tus Ntsuj Plig niaj hnub nrog peb nyob, tus Cawm Seej yuav ua kom peb ua neeg dawb huv

peb thiaj yuav tau txoj sia nyob mus ib txhis, uas yog qhov khoom plig tseem ceeb tshaj plaws (saib Q&K 14:7).

Nej nco qab ntsoov tus Cawm Seej cov lus uas hais tias: “Nim no qhov no yog txoj lus txib: Cia li hloov siab lees txim, nej sawv daws tag nrho hauv qab ntuj kawg, thiab los cuag kuv thiab ua kev cai raus dej nyob ntawm kuv lub npe, xwv kom nej yuav raug ua kom dawb huv los ntawm txoj kev txais ntawm tus Vaj Ntsuj Plig Dawb Huv, xwv kom nej yuav sawv tsis muaj qhov ceb rau ntawm kuv xub ntiag nyob rau hnuv kawg” (3 Nifais 27:20).

Cov lus txib no yeej muaj tus Tswv lo lus cog tseg hais tias:

Nws hais kom peb tso siab rau tus Ntsuj Plig uas koj peb ua zoo—ua ncaj ncees, txo hwj chim, thiab txiav txim raws li kev ncaj ncees; Nws tus Ntsuj Plig yeej zoo li no.

Nws hais rau nej tias, Nws yuav muab kuv tus Ntsuj Plig rau nej, uas yuav qhib nej lub paj hlwb, uas yuav ua rau nej tus ntsuj plig muaj kev zoo siab (saib Q&K 11:12–13).

Kuv hais lus pov thawj rau nej tias Vajtswv muaj txoj sia nyob, tias Yexus Khetos uas sawv rov los koj Nws lub Koom Txoos, tias Thomas S. Monson tuav tag nrho cov yuam sij hauv lub pov thawj hwj, thiab tias tej kev tshwm sim los ntawm tus Vaj Ntsuj Plig Dawb Huv koj kav thiab thiab txhawb nqa Yexus Khetos Lub Koom Txoos ntawm Tsoom Haiv Neeg Ntseeg hauv Hnuv Nyoog Kawg thiab nws cov mej zeej uas txo hwj chim.

Kuv kuj hais lus tim khawv tias cov txiv neej uas nej hnov hais lus hnuv no tau ua cov neeg tim khawv txog tus Tswv Yexus Khetos, ua cov neeg hauv Pawg Kaum Ob tug Thwj Tim, yeej raug hu los ntawm Vajtswv

los ua txoj hauj lwmm no. Kuv paub hais tias tus Ntsuj Plig tau koj Thawj Tswj Hwm Monson kev kom hu lawv. Thaum nej mloog lawv hais lus thiab hnov lawv zaj lus tim khawv, tus Vaj Ntsuj Plig Dawb Huv tau qhia tseeb rau nej ib yam li kuv hais rau nej tas sim no. Vajtswv yog tus uas hu lawv. Kuv txhawb nqa lawv thiab hlub lawv thiab paub tias tus Tswv hlub lawv thiab yuav txhawb pab lawv hauv lawv txoj hauj lwmm. Kuv ua tim khawv li no los ntawm Yexus Khetos lub npe, amees.

LUS CIM

1. *Handbook 2: Administering the Church* (2010), 20.3.10.
2. Saib George Q. Cannon, nyob hauv “Minutes of a Conference,” *Millennial Star*, Tsib Hlis Ntuj 2, 1863, 275–76.